



南方草木狀卷上 并序

永興元年十月丙子振威將軍襄陽太守嵇含撰

南越交趾植物有四裔最爲奇周秦以前無稱焉自漢武帝開拓封疆搜來珍異取其尤者充貢中州之人或昧其狀乃以所聞詮叙有裨子弟云爾

甘蔗望之如樹株大者一圍餘葉長一丈或七八尺廣尺餘二尺許花大如酒杯形色如芙蓉著莖末百餘子大名爲房相連累甜美亦可蜜藏根如芋魁大者如車轂實隨華每華一闔各有六子先後相次子不俱生花不俱落一名芭蕉或曰巴苴剥其子上皮色黃白味似蒲萄甜而脆亦療飢此有三種子大如拊指長而銳有類羊角名羊角蕉味最甘好一種子

大如鷄卵有類牛乳名牛乳蕉微減羊角一種大如藕子長六七寸形正方少甘最下也其莖解散如絲以灰練之可紡績爲絺綌謂之蕉葛雖脆而好黃白不如葛赤色也交廣俱有之三輔黃圖曰漢武帝元鼎六年破南越建扶荔宮以植所得奇草異木有甘蕉二本

耶悉茗花末利花皆胡人自西國移植於南海南人憐其芳香競植之陸賈南越行紀曰南越之境五穀無味百花不香此二花特芳香者緣自胡國移至不隨水土而變與夫橘北爲枳異矣彼之女子以綵絲穿花心以爲首飾末利花似薔薇之白者香愈於耶悉茗

豆蔻花其苗如蘆其葉似薑其花作穗嫩葉卷之而生花微紅穗頭深色葉漸舒花漸出舊說此花食之破氣消痰進酒增倍泰康二年交州貢一筐上試之有驗以賜近臣

山薑花莖葉即薑也根不堪食於葉間吐花作穗如麥粒軟紅色煎服之治冷氣甚效出丸真交趾

鶴草蔓生其花麴塵色淺紫帶葉如柳而短當夏開花形如飛鶴背翅尾足無所不備出南海云是媚草上有蟲老蛻爲蝶赤黃色女子藏之謂之媚蝶能致其夫憐愛

甘藷蓋薯蕷之類或曰芋之類根葉亦如芋實如拳有大如甌者皮紫而肉白蒸嚙食之味如薯蕷性不

甚冷舊珠崖之地海中之人皆不業耕稼惟掘地種  
甘藷秋熟收之蒸熟切如米粒倉園貯之以充糧糗  
是名藷糧北方人至者或盛具牛豕膾炙而未以甘  
藷薦之若粳粟然大抵南人二毛者百無一二惟海  
中之人壽百餘歲者由不食五穀而食甘藷故爾  
花之美者有水蓮如蓮而莖紫柔而無刺  
水蕉如鹿葱或紫或黃吳永安中孫休嘗遣使取二  
花終不可致但圖畫以進

蒟醬葦茛也生於蕃國者大而紫謂之葦茛生於番  
禺者小而青謂之蒟焉可以謂食故謂之醬焉交趾  
九真人家多種蔓生

菖蒲番禺東有澗澗中生菖蒲者一寸九節安期生

採服仙去但留玉舄焉

留求子形如梳子稜瓣深而兩頭尖似訶梨勒而經  
乃半黃已熟中有肉白色甘如棗核大治嬰孺之疾  
南海交趾俱有之

諸蔗一曰甘蔗交趾所生者圍數寸長丈餘頗似竹  
斷而食之甚甘窄取其汁曝數日成飴入口消釋彼  
人謂之石蜜吳孫亮使黃門以銀椀并蓋就中藏吏  
取交州所獻甘蔗錫黃門先恨藏吏以鼠屎投錫中  
啓言吏不謹亮呼吏持錫器入問曰此器既蓋之且  
有油覆無緣有此黃門將有恨汝吏叩頭曰嘗從臣  
求莞席臣以席有數不敢與亮曰必是此問之具服  
南人云甘蔗可消酒又名干蔗司馬相如樂歌曰太

尊蔗漿折朝醒是其義也泰康六年扶南國貢諸蔗  
一丈三節

草麴南海多美酒不用麴蘖但杵米粉雜以衆草葉  
治葛汁滄漉之大如卵置蓬蒿中蔭蔽之經月而成  
用此合糯爲酒故劇飲之既醒猶頭熱泔泔以其有  
毒草故也南人有女數歲即大釀酒既漉候冬陂池  
竭時真酒罌中密固其上瘞陂中至春漚水滿亦不  
復發矣女將嫁乃發陂取酒以供賀客謂之女酒其  
味絕美

芒茅枯時瘴疫大作交廣皆爾也土人呼曰黃茅瘴  
又曰黃芒瘴

南方冬無積藁瀕海郡邑多馬有草葉類梧桐而厚

取以秣馬謂之肥馬草馬頗嗜而食果肥壯矣

冬葉薑葉也苞苴物交廣皆用之南方地熱物易腐  
敗惟冬葉藏之乃可持久

蒲葵如枳櫚而柔薄可爲葵笠出龍川

藥有乞力伽木也瀕海所產一根有至數斤者劉涓  
子取以作煎令可丸餌之長生

楨桐花嶺南處處有自初夏生至秋蓋草也葉如桐

其花連枝萼皆深紅之極者俗呼貞桐花貞皆訛也  
水蔥花葉皆如鹿蔥花色有紅黃紫三種出始興婦

人懷妊佩其花生男者即此花非鹿蔥也交廣人佩  
之極有驗然其土多男不厭女子故不常佩也

蕪菁嶺嶠巴南俱無之偶有士人因官攜種就彼種

之出地則變爲芥亦橘種江北爲枳之義也至曲江  
方有菘彼人謂之秦菘

茄樹交廣草木經冬不衰故蔬圃之中種茄宿根有  
三五年者漸長枝幹乃成大樹每夏秋成熟則梯樹  
採之五年後樹老子稀即伐去之別栽嫩者

綽菜夏生於池沼間葉類茨菰根如藕條南海人食  
之云令人思睡呼爲瞑菜

蕪葉如落葵而小性冷味甘南人編葦爲筏作小孔  
浮於水上種子於水中則如萍根浮水面及長莖葉  
皆出於葦筏孔中隨水上下南方之奇蔬也治葛有  
大毒以蕪汁滴其苗當時萎死世傳魏武能噉心葛  
至一尺云先食此菜

治葛毒草也蔓生葉如羅勒光而厚一名胡蔓草實  
毒者多雜以生蔬進之悟者速以藥解不爾半日輒  
死山羊食其苗即肥而大亦如鼠食巴豆其大如狔  
蓋物類有相伏也

吉利草其莖如金釵股形類石斛根類芍藥交廣俚  
俗多蓄蠱毒惟此草解之極驗吳黃武中江夏李侯  
以罪徙合浦始入境遇毒其奴吉利者偶得是草與  
侯服遂解吉利即遁去不知所之侯因此濟人不知  
其數遂以吉利爲名豈李侯者徙非其罪或侯自有  
隱德神明啓吉利者救之耶

良耀草枝葉如麻黃秋結子如小粟煨食之解毒功  
用亞於吉利始者有得是藥者梁氏之子耀亦以爲

名梁轉爲良爾花白似牛李出高涼

蕙草一名薰草葉如麻兩兩相對氣如薜蘿可以止癘出南海

凡草木之華者春華者冬秀夏華者春秀秋華者夏秀冬華者秋秀其華竟歲故婦女之首四時未嘗無華也

南方草木狀卷上

南方草木狀卷中

楓人五嶺之間多楓木歲久則生瘤癭一夕遇暴雷驟雨其樹贅暗長三五尺謂之楓人越巫取之作術有通神之驗取之不以法則能化去

楓香樹似白楊葉圓而歧分有脂而香其子大如鴨卵二月華發乃著實八九月熟曝乾可燒惟九真郡有之

薰陸香出大秦在海邊有大樹枝葉正如古松生於沙中盛夏樹膠流出沙上方採之

榕樹南海桂林多植之葉如木麻實如冬青樹幹拳曲是不可以爲器也其本稜理而深是不可以爲材也燒之無焰是不可以爲薪也以其不材故能久而

無傷其蔭十畝故人以為息焉而又枝條既繁葉又茂細軟條如藤垂下漸漸及地藤梢入土便生根節或一大株有根四五處而橫枝及鄰樹即連理南人以爲常不謂之瑞木

益智子如筆毫長七八分二月花色若蓮著實五六月熟味辛雜五味中芬芳亦可鹽曝出交趾合浦建安八年交州刺史張津嘗以益智子粽餉魏武帝桂出合浦生必以高山之巔冬夏常青其類自爲林間無雜樹交趾置桂園桂有三種葉如栢葉皮赤者爲丹桂葉似柿葉者爲茵桂其葉似枇杷葉者爲牡桂三輔黃圖曰甘泉宮南有昆明池池中有靈波殿以桂爲柱風來自香

朱槿花莖葉皆如桑葉光而厚樹高止四五尺而枝葉婆娑自二月開花至中冬即歇其花深紅色五出大如蜀葵有藥一條長於花葉上綴金屑日光所爍疑若焰生一叢之上日開數百朵朝開暮落挿枝即活出高涼郡一名赤槿一名日及

指甲花其樹高五六尺枝條柔弱葉如嫩榆與耶悉茗末利花皆雪白而香不相上下亦胡人自大秦國移植于南海而此花極繁細纔如半米粒許彼人多折置襟袖間蓋資其芬馥爾一名散沫花

蜜香

沉香

鷄骨香

黃熟香

棧香

青桂香

馬蹄香

鷄舌香

案此八物同出於一樹也交趾有蜜香樹幹似拒柳



其花白而繁其葉如橘欲取香伐之經年其根榦枝節各有別色也木心與節堅黑沉水者為沉香與水面平者為鷄骨香其根為黃熟香其榦為棧香細枝緊實未爛者為青桂香其根節輕而大者為馬蹄香其花不香成實乃香為鷄舌香珍異之木也

枕榔樹似栟櫚實其皮可作纆得水則柔韌胡人以此聯木為舟皮中有屑如麩多者至數斛食之與常麩無異木性如竹紫黑色有文理工人解之以製弈枰出九真交趾

訶梨勒樹似木椀花白子形如橄欖六路皮肉相着可作飲變白髭髮令黑出九真

蘇材樹類槐花黑子出九真商人以染絳漬以大庾

之水則色愈深

水松葉如檜而細長出南海土產衆香而此木不大香故彼人無佩服者嶺北人極愛之然其香殊勝在南方時植物無情者也不香於彼而香於此豈屈於不知已而伸於知己者歟物理之難窮如此

刺桐其木為材三月三時布葉繁密後有花赤色間生葉間旁照他物皆朱殷然三五房凋則三五復發如是者竟歲九真有之

棹樹榦葉俱似椿以其葉鬻汁漬果呼為棹汁若以棹汁雜羶肉食者即時為雷震死棹出高涼郡

杉一名披粘合浦東二百里杉一樹漢安帝永初五年春葉落隨風飄入洛陽城其葉大常杉數十倍

術士廉盛曰合浦東杉葉也此休徵當出王者帝遣使驗之信然乃以千人伐樹役夫多死者其後三百人坐斷株上食過足相容至今猶存

荆寧浦有三種金荆可作枕紫荆堪作牀白荆堪作履與他處牡荆蔓荆全異又彼境有杜荆指病自愈節不相當者月暈時刻之與病人身齊等置牀下雖危困亦愈

紫藤葉細長莖如竹根極堅實重重有皮花白子黑置酒中歷二三十年亦不腐敗其莖截置煙灸中經時成紫香可以降神

槿藤依樹蔓生如通草藤也其子紫黑色一名象豆三年方熟其殼貯藥歷年不壞生南海解諸藥毒

蜜香紙以蜜香樹皮葉作之微褐色有紋如魚子極香而堅韌水漬之不潰爛泰康五年大秦獻三萬幅常以萬幅賜鎮南大將軍當陽侯杜預令寫所撰春秋釋例及經傳集解以進未至而預卒詔賜其家令上之

抱香履抱木生於水松之旁若寄生然極柔弱不勝刀鋸乘濕時剝而為履易如削瓜既乾則韌不可理也履雖猥大而輕者若通脫木風至則隨飄而動夏月納之可禦蒸濕之氣出扶南大秦諸國泰康六年扶南貢百雙帝深歎異然哂其制作之陋但置諸外府以備方物而已按東方朔瑣語曰木履起於晉文公時介之推逃祿自隱抱樹而死公撫木哀歎遂以

爲履每懷從亡之功輒俯視其履曰悲乎足下足下  
之稱亦自此始也

方草木狀卷中

南方草木狀卷下

欖榔樹高十餘丈皮似青桐節如桂竹下本不大上  
枝不小調直亭亭千萬若一森秀無柯端頂有葉葉  
似甘蕉條派開破仰望眇眇如插叢蕉於竹抄風至  
獨動似舉羽扇之掃天葉下繫數房房綴數十實實  
大如桃李天生棘重累其下所以禦衛其實也味苦  
澁剖其皮嚼其膚熟如貫之堅如乾棗以扶留藤古  
賁灰并食則滑美下氣消穀出林邑彼人以其爲貴婚  
族客必先進若邂逅不設用相嫌恨一名賓門藥錢  
荔枝樹高五六丈餘如桂樹綠葉蓬蓬冬夏榮茂青  
華朱實實大如鷄子核黃黑似孰蓮實白如肪甘而  
多汁似安石榴有甜酢者至日將中翕然俱赤則可

食也一樹下子百斛三輔黃圖曰漢武帝元鼎六年  
破南越建扶荔宮扶荔者以荔枝得名也自交趾移  
植百株于庭無一生者連年移植不息後數歲偶一  
株稍茂然終無華實帝亦珍惜之一旦忽萎死守吏  
坐誅死者數十遂不復茂矣其則歲貢焉郵傳者  
疲斃於道極爲生民之患

椰樹葉如栴櫚高六七丈無枝其實大如寒瓜外  
有粗皮次有殼圓而且堅剖之有白膚厚半寸味似  
胡桃而極肥美有漿飲之得醉俗謂之越王頭云昔  
林邑王舟越王有故怨遣俠客刺得其首懸之於樹  
俄化爲椰子林邑王憤之命剖以爲飲器南人至今  
效之當刺時越王大醉故其漿猶如酒云

楊梅其子如彈丸正赤五月中熟熟時似梅其味甜  
酸陸賈南越行紀曰羅浮山頂有胡楊梅山桃繞其  
際海人時登採拾止得於上飽噉不得持下東方朔  
林邑記曰林邑山楊梅其大如杯碗青時極酸既紅  
味如崖蜜以醞酒號梅香耐非重客不得飲之  
橘白華赤實皮馨香有美味自漢武帝交趾有橘官  
長一人秩二百石主貢御橘吳黃武中交趾太守士  
燮獻橘十七實同一蒂以爲瑞異群臣畢賀  
柑乃橘之屬滋味甘美特異者也有黃者有賴者賴  
者謂之壺柑交趾人以席囊貯蟻鬻於市者其窠如  
薄絮囊皆連枝葉蟻在其中并窠而賣蟻赤黃色大  
於常蟻南方柑樹若無此蟻則其實皆爲群蠹所傷

無復一完者矣今華林園有柑二株遇結實上命群臣宴飲于旁摘而分賜焉

檄椌樹身聳枝皆高數丈其子深秋方熟味雅吉澁咀之芬馥勝含鷄骨香吳時歲貢以賜近侍本朝自秦康後亦如之

龍眼樹如荔枝但枝葉稍小殼青黃色形圓如彈丸核如木粽子而不堅肉白而帶凝其甘如蜜一朶五六十顆作穗如葡萄然荔枝過即龍眼執致謂之荔枝奴言常隨其後也東觀漢記曰單于來明楊橙橘龍眼荔枝魏文帝詔群臣曰南方果之珍異者有龍眼荔枝今歲貢焉出九真交趾

海棗樹身無閑枝直聳三四十丈樹頂四面共生十

餘枝葉如栟櫚五年一實實甚大如杯盈核兩頭不尖雙卷而圓其味極甘美安邑御棗無以加也秦康五年林邑獻百枚昔李少君謂漢武帝曰臣嘗遊海上見安期生食臣棗大如瓜非誕說也

千歲子有藤蔓出土子在根下鬚綠色交加如織其子一苞恒二百餘顆皮殼青黃色殼中有肉如栗味亦如之乾者殼肉相離撼之有聲似肉豆蔻出交趾五斂子大如木瓜黃色皮肉脆軟味極酸上有五稜如刻出南人呼稜爲斂故以爲名以蜜漬之甘酢而美出南海

鈎緣子形如瓜皮似橙而金色胡人重之極芬香肉甚厚白如蘆服女工競雕鏤花鳥漬以蜂蜜點燕檀

巧麗妙絕無與爲比泰康五年大秦貢十缶帝以三

缶賜王愷助其珍味夸示於石崇

海梧子樹似梧桐色白葉似青桐有子如大栗肥甘可食出林邑

海松子樹與中國松同但結實絕大形如小栗三角肥甘香美亦罇俎間佳果也出林邑

菴摩勒樹葉細似合昏花黃實似李青黃色核圓作六七稜食之先苦後甘術士以變白鬚髮有驗出九真

石栗樹與栗同但生於山石罅間花開三年方結實其殼厚而肉少其味似胡桃人熟時或爲群鸚鵡至啄食略盡故彼人極珍貴之出日南

人面子樹似含桃結子如桃實無味其核正如人面故以爲名以蜜漬之稍可食以其核可玩於席間飮餽禦客出南海

雲丘竹一節爲船出扶南然今交廣有竹節長二丈其圍一二丈者徃徃有之

篋筲竹皮薄而空多大者徑不過二寸皮麤澁以鏽犀象利勝於鐵出大秦

石林竹似桂竹勁而利削爲刀割象皮如切芋出九真交趾

思摩竹如竹大而筍生其節筍旣成竹春而筍復生節焉交廣所在有之

簞竹葉踈而大一節相去六七尺出九真彼人取嫩

者礎浸紡績為布謂之竹踈布

越王竹根生石上若細荻高尺餘南海有之南人愛其青色用為酒籌云越王棄餘筭而生竹

南方草木狀卷下

竹譜

晉武昌戴

凱之

慶豫撰

植類之中有物曰竹不剛不柔非草非木

山海經爾雅皆言以竹為草事經聖賢未有改易然則稱草良有難安竹形類既自乖殊且經中文說又自背伐經云其草多族復云其竹多箬又云雲山有桂竹若謂竹是草不應稱竹今既稱竹則非草可謂知矣竹是一族之總名一形之偏稱也植物之中有草木竹猶動品之中有魚鳥獸也年月久遠傳寫謬誤今日之疑或非古賢之過也而此之學者謂事經前賢不敢辯正何異匈奴惡郅都之名而畏木偶之質耶

小異空實大同節目

夫竹之大體多空中而時有實十或一耳故曰小異然雖有空實之異而未有竹之無節者故曰大同

或茂沙水或挺巖陸

桃枝實簞多植水渚篁篠之屬必生高燥

條暢紛敷青翠森肅質雖冬禕性忌殊寒九河鮮育五嶺實繁

九河即徒駭太史馬頰覆金胡蘇簡絜鉤盤鬲津禹所導也在平原郡五嶺之說互有異同余往交州行路所見兼訪舊老考諸古志則今南康始安臨賀爲北嶺臨漳寧浦爲南嶺五都界

內各有一嶺以隔南北之水俱通南越之地南康臨賀始安三郡通廣州寧浦臨漳二郡在廣州西南通交州或趙他所通或馬援所併厥跡在焉故陸機請伐鼓五嶺表道九真也徐廣雜記以剡松陽建安康樂爲五嶺其謬遠矣俞益期與韓康伯以晉興所統南移大營九岡爲五嶺之數又其謬也九河鮮育忌隆寒也五嶺實繁好殊温也

萌荀苞籜夏多春鮮根幹將枯花復乃縣

竹生花實其年便枯死復竹實也復音福

筴必六十復亦六年

竹六十年一易根易根輒結實而枯死其實落



土復生六年遂成町竹謂死爲笱笱音紂  
鐘龍之美爰自崑崙

鐘龍竹名黃帝使伶倫伐之於崑崙之墟吹以  
應律聲譜云鐘龍大竹此言非大小之稱笛賦  
云鐘龍非也自一竹之名耳所生若是大竹豈  
中律管與笛

負丘帝竹一節爲船巨細已聞形名未傳

負丘帝俊竹一節爲船郭注云一節爲船未詳  
其義俊即舜字假借也

桂實一族同稱異源

桂竹高四五丈大者二尺圍闊節大葉狀如甘  
竹而皮赤南康以南所饒也山海經云靈原桂

竹傷人則死是桂竹有二種名同實異其形未  
詳

衛尤勁薄博矢之賢

衛細竹也出蜀志薄肌而勁中三續射博箭衛  
音衛見三倉

篁任篙笛體特堅圓

篁竹堅而促節體圓而質堅皮白如霜粉大者  
宜行船細者爲篙篁音皇見三倉

棘竹駢深一叢爲林根如推輪節若束針亦曰笆竹  
城固是任篋筍旣食鬚髮則侵

棘竹生交州諸郡叢初有數十莖大者二尺圍  
肉至厚實中夷人破以爲弓枝節皆有刺彼人

種以爲城卒不可攻萬震異物志所種爲藩落  
阻過層墉者也或卒崩根出大如十石物縱橫  
相承如縵車一名笹竹見三倉筍味落人鬚髮  
單體虛長各有所育

單竹大者如腓虛細長爽嶺南夷人取其筍未  
及竹者灰煮績以爲布其精者如縠焉

苦實稱名甘亦無目

苦竹有白有紫而味苦甘竹似篁而茂葉下節  
味甘合湯用之此處處亦有

弓竹如藤其節却曲生多卧土立則依木長幾百尋  
狀若相續質雖含文須膏乃縹

弓竹出東垂諸山中長數十丈每節輒曲既長

且軟不能自立若遇木乃倚質有文章然要須  
膏塗火灼然後出之篾卧竹上出也

厥族之中蘇麻特奇脩幹平節大葉繁枝凌群獨秀  
翁茸紛披

蘇麻竹長數丈大者尺餘圍概節多枝叢生四  
枝葉大如履竹中可愛者也此五嶺左右偏有

之  
篔簹射筒筵桃枝長爽纖葉清肌薄皮千百相亂

洪細有差

數竹皮葉相似篔簹最大大者中甌筍亦中射  
筒薄肌而最長節中貯箭因以爲名筵葉薄  
而廣越女試劔竹是也桃枝是其中最細者並

見方志賦桃枝皮赤編之滑勁可以為席顧命  
篇所謂篾席者也爾雅釋草云四寸一節為桃  
枝郭注云竹四寸一節為桃枝余之所見桃枝  
竹節短者不兼寸長者或踰尺豫章偏有之其  
驗不遠也恐爾雅所載草族自別有桃枝不必  
是竹郭注加竹字取之謬也山海經云其木有  
桃枝劔端又廣志層木篇云桃枝出朱提郡曹  
爽所用者也詳察其形寧近於木也但未詳爾  
雅所云復是何桃枝耳經雅所說二族決非作  
竹席者矣廣志以藻為竹是誤後生學者往往有  
為所誤者耳

相繇既戮厥土維腥三堙斯沮尋竹乃生物尤世遠

### 略狀傳名

禹殺共工相繇二臣膏流為水其處腥臊不植  
五穀禹三堙皆沮尋竹生焉在崑崙之北有嶽  
之山見大荒北經中

般腸實中與筍相類於用寡宜為筍殊味

般腸竹生東郡緣海諸山中其筍最美云與筍  
竹相似出閩中並見沈志其形未詳

筋竹為矛稱利海表槿仍其幹刃即其杪生於日南  
別名為篔

筋竹長二丈許圍數寸至堅利南土以為矛其  
筍未成竹時堪為弩絃見徐忠南中奏劉淵林  
云夷人以史葉竹為矛余之所聞即是筋竹豈

非一物而二名者也

百葉參差生自南垂傷人則死醫莫能治亦曰筲竹厥毒若斯彼之同異余所未知

百葉竹生南垂界甚有毒傷人必死一枝百葉因以為名沈志劉淵材云筲竹有毒夷人以刺虎豹中之輒死或有一物二名未詳其同異

筲與由衙厥體俱洪圍或累尺筲實衙空南越之居梁柱是供

筲實厚肥孔小幾於實中二竹皆大竹也士人用為梁柱筲竹安成以南有之其味苦俗號筲由衙竹交州廣志云亦有生於永昌郡為物叢生吳郡賦所謂由衙者筲音雷性柔弱見三

倉

竹之堪杖莫尚於筲礫阿不凡狀若人功豈必蜀壤亦產餘邦一曰扶老名實縣同

筲竹高節實中狀若人刻為杖之極廣志云出南廣邛都縣然則邛是地名猶高粱董張騫傳云於大夏見之出身毒國始感邛杖終開越雋越雋則古身毒也張孟陽云邛竹出興古盤江縣山海經謂之扶竹生尋伏山去洞庭西北一千一百二十里黃圖云華林園有扶老三株如此則非一處賦者不得專為蜀地之生也禮記曰五十杖於家六十杖於鄉者扶老之器也此竹實既固杖又名扶老故曰名實縣同也

籜簞二族亦甚相似杞髮苦竹促節薄齒東物體柔  
殆同麻象

籜簞二種至似苦竹而細軟肌薄籜筍亦無味  
江漢間謂之苦籜見沈志籜音聊簞音禮齒有  
又理也

蓋竹所生大抵江東上密防露下踈來風連畝接町  
踈散崗潭

蓋竹亦大薄肌白色生江南深谷山中不聞人  
家植之其族類動有頃畝典錄賀齊傳云討建  
安賊洪明於蓋竹蓋竹以各地猶酸棗之邑豫  
章之名邦者類是也

雞脰似筍至高而筍脆稀葉梢杪類記黃細

雞脰筍竹之類纖細大者不過如指踈葉黃皮  
彊肌無所堪施筍美青斑色綠沁江山崗所饒  
也

狗竹有毛出諸東裔物類衆詭千何不計

狗竹生臨海山中節間有毛見沈志

有竹象蘆因以為名東甌諸郡緣海所生肌理勻淨  
筠色潤貞凡今之箎匪茲不鳴

此竹膚是蘆出揚州東垂諸郡浙江以東為甌  
越故曰東甌蘇成公始作箎似於今箎故曰凡  
今之箎

會稽之箭東南之美古人嘉之因以命矢

箭竹高者不過一丈節間三尺堅勁中矢江南

諸山皆有之會稽所生最精好故爾雅云東南之美者有會稽之竹箭焉非總言矣大抵中矢者雖多此箭為最古人美之以首其目見方言是以楚俗伯細箭五十跪加莊王之昔明非矢者也

菌籥載籍首名荆鄙

菌籥二竹亦皆中矢皆出雲夢之澤禹貢篇出荆州書云底貢名言其有美名故貢之也大較故是會稽箭類耳皮特黑澁以此為異呂氏春秋云駱越之菌然則南越亦產不但荆也

箭亦菌徒概節而短江漢之間謂之箴竹山海經云其竹名箴生非一處江南山谷所饒

也故是箭竹類一尺數節葉大如履可以作蓬亦中作矢其筍冬生廣志云魏時漢中太守王圖每冬獻筍俗謂之箴箭箴苦恠反

根深耐寒茂彼淇苑

比土寒冰至冬地凍竹根類淺故不能植唯箴根深故能晚生淇園衛地殷紂竹箭園也見彪志淮南子曰烏號之弓貫淇衛之箭也毛詩所謂瞻彼淇奧綠竹猗猗是也

箴篠蒼蒼接町連篁性不卑植必也崑崙踰矢稱大出尋為長物各有用掃之最良

箴篠中掃帚細竹也特異他篠見廣志至大者不過如箭長者不出一丈根杪條等下節生惟

高陰動有町畝廬山所饒也掃箒之選尋陽人  
往往取下都貨焉

又有族類爰挺嶧陽懸根百仞竦幹風生簫笙之選  
有聲四方質清氣亮衆管莫伉

魯郡鄒山有篠形色不殊質特堅潤宜爲笙管  
諸方莫及也笙賦云所謂鄒山大竹嶧陽孤桐  
此山竹特能貞絕也

亦有海篠生於島岑節大盈尺幹不滿尋形枯若筋  
色如黃金徒爲一異罔知所任

海中之山曰島山有此篠大者如筋內實外堅  
拔之不曲生旣危壩海又多風枝葉稀少狀若  
枯筋質雖小異無所堪施交州海石林中徧饒

是也

赤白二竹還取其色白薄而曲赤厚而直沅澧所豐  
餘邦頗植

頗少也俗曰白鹿竹亦可作簞潯陽郡人呼爲  
白木竹燥時皮肉皆赤武陵溪中是所豐足也  
蕭蕭箇箇黃夏攢植擢筍於秋冬乃成竹無大無小  
千萬脩直篔簹幕內曷繡文外絕

箇箇竹大如脚指堅厚脩直腹中白幕闌隔狀  
如濕麪生衣將成竹而筍皮未落輒有細蟲齧  
之隕籜之後蟲齧處往往成赤文頗似綉畫可  
愛南康所生見沈志也

菰筴誕節內實外澤作貢漢陽以供輅策

菰筴竹生於漢陽時獻以為輅馬策見南郡賦  
浮竹亞節虛軟厚肉臨溪覆潦栖雲陰木洪筍滋肥  
可為旨蓄

浮竹長者六十尺肉厚而虛軟節闊而亞生水  
次彭蠡以南大嶺以北徧有之其筍未出時掘  
取以甜糟藏之極甘脆南人所重旨蓄謂草菜  
甘美者可蓄藏之以候冬詩曰我有旨蓄可以  
禦冬

厥性異宜各有所育篔簹植于宛筴生于蜀

篔簹竹見南郡賦筴竹見蜀都賦

細篠大蕩

書云篠蕩既敷鄭玄云篠箭蕩大竹也

竹之通目玄名統體譬牛與犢人之所知事生軌躅

車迹曰軌馬迹曰躅

赤縣之外焉可詳錄臆之必之匪邁伊矚

鄒子云今四海謂之瀛海瀛海之內謂之赤縣  
瀛海之外如赤縣者復有八故謂之九州非禹  
貢所謂九州也天地無邊蒼生無量人所聞見  
因軌躅所及然後知耳蓋何足云若耳目所不  
知便斷以不然豈非愚近之徒者耶故孔子將  
聖無意無必莊生達邁以人所知不若所不知  
豈非苞鑿無窮師表群生之謂乎



竹譜



